

TE HEHEURAA API

NENEIHIA I ROTO I TE PIHA NENEIRAA A TE EKALLESIA A IESU MESIA I TE
FEIA MO'A I TE MAU MAHANA HOPEA NEI.
PAPEETE, TAHITI, I TE MAU AVA'E ATOA.

Te hoo: E 2 farane i te matahiti.

No. 4

Eperera 1937.

Mat. 31.

E imi maite, e pure pinepine mai te faaroo, ei reira te mau mea'toa e faairohia'i ei maitai no outou, ia afaro ra to outou haerea, e ia haamana'ohia te faufaa ta outou i fafau, outou, outou iho. B. F. 90:24.

O te Fatu to'u tauturu, e ore au e mata'u i ta te taata e rave mai ia'u nei. Hebera 13:6.

E Parau Haaitoitoraa.

E TE Ekalesia e, te parau atu nei maua ia outou na, la
Ora na tatou i te aroha rahi o te Mesia.

Ua mauruuru hoi maua i te tae faahouraa mai i to tatou mau fenua moana nei.

Ua reva'tu to tatou Peretiteni o Le Roy Mallory, ta'na vahine o Muria Mallory e ta raua na tamarii tootoru i te fenua ra i Roto Miti. Te pure atu nei maua, i te Atua, ia tauturu hia ratou i to ratou haereraa.

E ohipa maitai roa tei ravehia e ratou i te nohoraa i te mau fenua moana nei e ua tae maira te parau apî ia ratou, a ho'i ana'e mai i te fenua America. Ua mauruuru roa te Peropheta o Hebera GARANATA no ta ratou faatereraa e te raveraa i te mau huru ohipa maitatai i ô nei, no reira, te oaoa nei maua no taua mau ohipa paari ra, te maitai e te itoitohi.



E hohoa teie no te Peretiteni ra o Toma WOODBURY e ta'na Vahine o Mate WOODBURY.

Mai te taata i fanauhia mai, e e rave papu i te ohipa parau-tia i te ao nei ra, ia ôti roa taua ohipa ra, e ho'i atu ia oia i te Atua ra. Na reira atoa te Peretiteni o Le Roy Mallory ma, ua tae mai ratou i ô nei, rave ihora ratou i te ohipa maitai faito ore, e i teie nei ua ôti roa tana ohipa ra e ua na ô mai te Peropheta ia ratou: "*A ho'i maira,*" e ua na reira ratou.

Ua mauruuru maua i te farereiraa ia ratou e i to matou parahiraa poto i te Fare Orometua i Papeete, e i teie nei ua reva'tu ratou e farerei faahou i to ratou mau fetii, te Ekalesia e te mau hoa o tei parahi i Roto Miti.

Te hinaaro nei maua ia ite mata, tatou atoa, i teie Amuiraa te faatiahia i Takaroa, e ia farerei i te mau taata maohi tei parahi i te mau fenua moana, te mau pīpī o te Atua, te feia parau-tia, e te Ekalesia a Iesu Mesia i te Feia Mo'a no te Mau Mahana Hopea Nei.

Iao'ra na tatou e tae noa'tu i te farerei faahou-raa, o te parau teie i papaihia e

Tema raua o Mate.

E Rata na to tatou Peretiteni tahito.

Te 5 no Mati 1937.

Na te mau Orometua e te mau Feia Mo'a tei putuputu i te Amuiraa i Takaroa.

E to'u mau Taeae, te mau Tuahine e te mau hoa;

Ia ora na tatou i te aroha o te Atua na roto i teie rata iti.

Ua faaineine e ua tiaturi maua ia tae atu i ta outou Amuiraa ia farerei faahou ia outou, ma te oaoa rahi, i roto i te ohipa nei. Area ra, i roto i to tatou tiaraa i roto i teie nei Ekalesia rahi, te faaroo nei tatou e, e mea tia ia auraro hia te mau feia faatere, e i to maua faaineineraa no te haereraa i te Amuiraa, ua tae mai te parau na te Peropheta e, "Ua oti ta maua ohipa i teie nei paeau o te ao e e hoi maua i te fenua"; no reira aita tatou e farerei i teie nei mahana.

Ma te oto i roto i to maua aau, te vaiiho nei maua i muri to maua mau taeae, te mau tuahine e te mau hoa e rave rahi, tei herehia e maua, tei tauturu mai ia maua no te haamanuiaraa i ta maua mau ohipa, na roto i to outou haapao maitairaa i ta outou mau ohipa e te mau ture a te Atua. No to outou mau maitai te hinaaro nei maua ia faaite atu i to maua mauruuru ia outou na roto i teie rata iti, no te mea eita paha tatou e farerei i te pae tino nei. Te mauruuru nei maua i to tatou Metua i te ao ra, no To'na faatiraa ia maua ia haere mai i to outou fenua nehenehe e no te mau mahana oaoa e rave rahi ta maua i farerei i teie paeau moana nei, a parahi ai maua i rotopu ia outou, e i te taima e faaroo ai outou i te tai'oraa o teie rata iti, tei roto paha maua i te Fare Menemene i te amuiraa'tu no te Amuiraa Eperera; area ra, tei onei to maua mau mana'o i rotopu ia outou na.

E mea papu ia maua e, e oaoa outou ia farerei i to outou Peretiteni apî o Toma WOODBURY e ta'na vahine o Mate, e na taata raua tei hau roa'tu i te maitai e tei titau ia haere te ohipa i mua. Ua mauruuru roa maua i te F'atu i te mea e, ua maiti Oia ia raua no te faatere i Ta'na ohipa i teie pae o te ao. Te ani atu nei maua ia tahoê atu outou ia raua, ia here e ia faatura'tu outou ia raua i roto i ta raua mau ohipa atoa, mai ia outou i tauturu mai ia maua, ia riro to raua mau mahana faaeearaa ei mahana oaoaraa.

Eita paha tatou e farerei faahou i teie nei oraraa, no reira te pure nei maua ia ora outou atoa, e ia tae te taima e anihia'i tatou ia ho'i i mua i to tatou Atua, e farerei faahou tatou i reira e e ore roa tatou e faataa ê faahou hia.

Ia haamaitahia outou e te Atua i roto i ta outou mau ohipa parau tia. O te pure ia o to outou taeae e te tuahine o

E AO TO TE AROHA

I TE tahi anotau i mairi a'enei, to ora ra te hoê Arii. E rave rahi to'na mau fare, i tera vahi e i tera vahi i roto i to'na basileia. Ua aroha roa teie arii i to'na mau taata e ua haere oia i te tahi vahi e tauturu i te man taata, e i muri iho ua haere oia i te tahi atu vahi.

Te hoê o to'na mau fare, e mea nehenehe roa ia; ua haatihiā ia i te mau tiare nehenehe e te mau tumu raau nehenehe roa. I te hoê mahana ua faaite oia i te mau taata i pihaiiho i taua fare ra, e haere atu oia i reira, e ua hinaaro oia ia farerei i te mau taata atoa e ua hinaaro oia ia faaite mai ratou i to ratou mau peapea no te mea te hinaaro nei oia ia tauturu ia ratou.

Tei pihaiiho i taua vahi ra te hoê uru raau huru rahi e i te tahi pae o taua uru raau ra, te parahi ra te hoê taata e ta'na vahine e ta raua tamahine nainai. Ua rave teie taata i te hoê ohipa, oia hoi, te tapuraa i te mau raau ia hoo atu ei vahie. Aita râ i ravai roa te reira no te hooraa i te maa e te ahu no ratou. E mea pohe noa te vahine i te ma'i e na te tamahine iti e rave i te mau ohipa o te fare, na'na e tunu i te maa, e haapao i to'na mama e e faanehenehe i te fare.

Ia faaroo teie tamahine e, e haere mai te arii i reira, hinaaro atura oia ia haere e ani ia'na ia tauturu oia ia ratou. Ua hi'o oia i to'na mama e ite atura oia e, ua taoto, i reira tupu atura to'na mana'o ia haere e ori haere na roto i te uru raau. I to'na haereraa ua ferru noa oia i te arii; i te reira taima ua faaroo oia i te ta'i o te hoê manu nainai, ua imi oia i taua manu ra e ua ite oia, na pepe rii to'na pererau. Ua parau te tamahine: E nehenehe anei ia'u ia tauturu i oe? Ua parau te manu, mai te mea e taurami oe i to'u pere-

rau e ora ia vau. Taurami noa ihora te tamahine e ora roa a'era te manu. I reira ua ani te manu Te haere nei oe i hea? Ua pahono te tamahine: Te haere nei au, na roto i te uru raau, e farerei i te arii. Te hinaaro atoa ra oe i te haere? Ua parau maira te manu, E, oia mau, e ua mau noa te manu na pihai iho ia'na.

I to raua haere raa ua faaroo raua i te ta'i o te hoê piifare, e ua ite ihora raua i te hoê piifare tei mau i te faahohoni. Ua parau te tamahine, e tauturu vau ia oe, e ua haamata ihora te faahohoni e ua iriti i te avae o te piifare e ua maitai ihora oia. Ua ui te piifare i te tamahine i te vahi ta'na e haere ra, e ua faaite te tamahine te haere ra oia e farerei i te arii, e ua pee atoa ihora te piifare na muri i te manu e te tamahine.

Ua haere rii â ratou e ua faaroo i te ta'i o te hoê uri nainai, e ua ite atura ratou i te hoê amaa raau tei nia iho i te uri. Ua iriti ihora te tamahine i te raau e ua maitai atura te uri. Ia faaitehia te haere ra ratou e farerei i te arii ua hinaaro atoa'tura te uri ia haere e farerei ia'na.

Aita i maoro ua tae ratou i te hopea o te uru raau e ua ite atura ratou i te fare o te arii e ua haaatihia taua fare ra e te taata, e ua mana'o ihora te tamahine, eita e tia ia'na ia haere i pihaiho i te arii no te faaite ia'na i to'na tere. I reira ua parau te piifare; ua tauturu oe ia'u, no reira, e tauturu vau ia oe. E horo vau na roto i te mau taata e ia ore ra ia taataahi ia'u, e faaatea rii ratou, e e horo oe na muri ia'u. Uu parau atoa te uri; ua tauturu atoa oe ia'u e e tauturu atoa vau ia oe. Ia tae oe i pihaiho i te arii e aoa noa vau ia faaroo oia e ia hi'o i muri ia ite e, eaha ra te peapea. I reira ua parau te manu; no ta oe tautururaa mai ia'u, e tauturu atoa vau ia oe. Ia aoa mai te uri e himene au ia ite te arii ia oe.

I te reira taime ua horo te piifare na roto i te mau taata e ua faaatea rii ratou ia ore ratou e taataahi ia'na, e ua pee ihora te uri, te manu e te tamahine, na muri ia'na. I to ratou taeraa i pihai iho i te arii, te paraparau noa ra te mau taata e aita roa te arii i faaroo i te tamahine i te parauraa mai ia'na. I reira ua aoa mai te uri e ua faaea ihora te mau taata i te parauraa, no te mea ua rahi roa te maniania e aita ta ratou e ravea no te faarooraa'tu i ta te tahi parauraa ra. Ua himene ihora te manu na nia i te upoo o te arii ia hi'o oia i muri ia'na, e ua maere roa te arii; ite atura oia i te tamahine e ua ani oia ia'na i te tumu o to'na tere.

Ua faaite maira te tamahine i te huru o to'na mama e to'na papa e to ratou mau peapea atoa, e ua ani oia ia'na ia tauturu ia ratou.

Ua horoa maira te arii i te tahi mohina raau maitai roa ia ora to'na mama e te tahi pute moni rahi, ia ore ratou e haapae faahou i te maa. Ua horoa atoa oia i te tahi mau aahu no te tamahine e ua faaue oia i to'na taata faahoro pereoo ia afai i te tamahine i to'na fare, e ua haere atoa te piifare, te manu e te uri na muri ia'na ra.

E ao to tei aroha ia vetahi ê ra; e aroha-atoa-hia mai ratou.
Mataio 5: 7.

Papaihia e Tihoti Crometua.

E tiaturi na outou i te Atua ma te aau aueue ore, e e pure atu ia'na ra ma te faaroo rahi, e na'na ia e faaherehere mai ia outou i to outou mau ati. *Iakoba 3: 1.*

Te Aroha No Tei Pohe.

GA TUPU te roo o te taata ra o Dr. Parkes CADMAN, o tei pohe a'enei, no ta'na mau a'oraa na roto i te radio. Aita oia i faaroo e, e hopea ino e te pouri to te mau taata te pohe i rapae i te uputa ora o te Evanelia.

Ua faaroo a'enei te mau taata, e rave rahi te milioni, i tana paraparau raa no nia i te hoê tumu parau tei haamata i te tae i roto i te mana'o o te mau taata feruri. Teie taua parau ra e te pahonoraa atoa.

I to outou mana'oraa, e riro te mau varua, tei ore i farii e a ore ra, tei patoi i te parau mau tei itehia i roto i te Evanelia i to ratou orarua nei, ei aha ?

Te feia tei ore roa i faaroo i te i'oa o Iesu, o ratou ia te pae rahi, mai te parahiraa hia teie nei ao, tei ora e tei pohe i raro nei. E e rave rahi hoi te milioni o te taata te ora nei e tei au atu hoi to ratou huru. Eita e tia ia tatou ia feruri i nia i to ratou rahiraa.

I teie nei â mahana eaha te rahiraa o te taata e ora nei, i roto i te mau fenua cheresitiano, tei ore roa i haroaroa i te parau no te faaroo i roto i te Faufaa Apî, no te huru o to ratou fanauraa e to ratou haapiiraahia, mai te man Heleni, i tahito ra, tei ore roa i faaroo i te hoê parau no Iesu. A haamana'o na i te myriadi o te mau tamarii hara ore, tei pohe hou te noaa raa ia ratou te matahiti e taa'i ia ratou no te faatereraa ia ratou iho.

Noa'tu e aita ta oe uiraa i taa maitai, ua riro ia oia ei hoipoia teiaha mai te mea e, o ratou ana'e tei farii papu ma te ite, i te Mesia, te tae atu i mua i to'na aro. Mai te mea ua ora e te ora nei te rahiraa taata, ia ora ratou e a muri noa'tu, mai tei haapiihia mai, e e parahi ratou i te tahi vahi, no

te aha ĩa e taotiahia'i te aroha faaora, o te Atua, i teie oraraa nei ?

A faito na i te reira huru i nia i tei herehia e outou e i muri iho a faaau atu i te mau taata atoa. No te mea o te Atua te metua o te taatoa, te tiaturi nei matou e, e ore roa te hoê varua e moe i to'na mata e hoê ana'e to ratou faito. *E vai noa to'na aroha.* Te mau haapaoraa faaroo tei parau e, no teie ana'e oraraa te reira aroha, te faaino ra ĩa ratou i te reira e te haapeapea ra ratou i te tumu no to'na faatiaraahia.

Te vai atura.

NA TE HAAPĪI HAHĀERE NA TE MAU UTUAFARE.

Parau tumu: Te faaroo nei matou i te Atua te Metua mure ore, e i ta'na Tamaiti ia Iesu Mesia, e i te Varua Maitai hoi.

Iosepha SEMITA.

Te ohipa matamua o na Haapii o te hahāere i te mau utuafare o te mau melo no te Ekalesia, e to ratou mau hoa atoa ra, o teie ĩa: “ Haapii ratou i te parau tia a te Atua ra, eiaha te mau peapea taata, e te mau ohipa êê o te ravehia e te pŭpŭ Ekalesia. Eiaha atoa te mau peapea e te tama'i fenua, e te ino tei tupu i ô te mau taeae e te mau tuahine.

E parāparau ra no nia i te mea maitai te faatupu i te faaroo, te tatarahapa e te bapetizoraa. O ta matou ĩa ohipa i te ao nei, e ohipa tauturu, e ei faaitoitōraa i te taata hiaai parau tia.

Ia oti te tamahanahanaraa e himene i te tahi himene o te au i te taata o taua parahiraa ra.

E pure i te Metua ra, na roto i te i'oa o Iesu Mesia, ia haamaitaihia taua utuafare ra, e i reira e haapii i te *Parau tumu* ra, ia ite maitai ratou i te tai'oraa i te reira.

I te ava'e Eperera e haapii i te faaroo i te Atua. O te parau matamua ia, e ia papu maitai te faaroo ra, eita ia e matoro e rave te taata i te ohipa o te au maitai i taua faaroo ra. Ia maramarama te taata i te faaroo e te ohipa o taua faaroo ra, te fatata nei taua taata ra i te e'a o te paari e te parautia.

No reira ia hahaeere i tera utuafare e i tera utuafare ma te parau papu ia orua na, e mea manuia roa te tere. E tamata orua i teie nei faaueraa maitai, e ia na reira orua, te tohu atu nei au e, ia oti te hahaeereraa utuafare e i roa to orua aau i te poupon, te oaoa e te maitai o te taata.

No te toroa e te faaueraa, eiaha orua e faatau, e faaitoitōra i te rave maitairaa i taua ohipa haapii taata ra, e e faaite atu matou i te parau tumu o te mau Haapii hahaeere utuafare i te ava'e i mua nei, e o te parau no te *Faaroo* i te Atua to teie ava'e nei.

Papaihia e Toma Peretiteni.

Tatai hoê ta'u e rave i te oire hoê, e tatai piti hoi i to te opu hoê, a aratai ai ia outou i Ziona. E horoa'tu vau i te orometua na outou i tei au i to'u aau nei, o te faaamu ia outou i te ite e te haapao maitai. Ieremia 3: 14-15.

E mea maitai te amu ore i te i'o, e te inu ore i te uaina, e te rave ore i te mau mea atoa e turori ai to taeae, e maheaitu ai e e paruparu ai hoi. Roma 14: 21.

TE MAU PARAU API

Ua pohe o Mohi a Makitua.

I te hora 2 e te afa, i te 4 no Mati 1937, ua ani mai te Fatu i te hoê o ta'na mau tavini ia haere atu Ia'na ra, e mai te au i ta'na haapaoraa, ma te patoi ore, i te mau ture a te Atua i nia i te fenua nei, ua haapao atoa oia i te faaueraa hopea i nia i tete nei ao. E mai te au i ta'na parau hopea, ta'na i parau atu i ta'na tamaiti, ia Tuhiva, " Ua Oti ". Ua oti ihoa tana mau ohipa i nia i teie nei ao e ua reva'tu oia i te vahi i faaineinehia no'na ra.

Ua fanauhia o MOHI a MAKITUA, i roto i teie nei ao, i te 11 no Novema 1867, i te fenua ra i Hikueru. Ua baptizohia oia i te matahiti 1888, e mai te reira tau ua rave itoitoe oia i te ohipa a te Atua. Ua farerei oia i te mau ati no te pae tino nei, ua mo'e oia e piti taime i nia i te poti nainai i tua, te taime matamua, e iva mahana te maoro. Ua huri te poti e ua mo'e te pape e te maa e ua mana'ohia e te tahi mau taata, ua mo'e ratou, area ra o Mohi ra, aita roa oia i feaa, ua tiaturi oia i te Atua e na roto i to'na faaroo e te pure, ua faaorahia ratou.

Ua haere to tatou taeae here i tera Amaa e i tera Amaa ia haapii haere i te Evanelia a te Fatu, e ua haapii atu oia mai te au i ta Iesu i haapii atu i to'na anotau, na roto i te haehaa e te aroha, noa'tu i te huru o te taata, ua aroha o Mohi ia'na ra. Ua haere o Mohi na roto i te mau utuafare tei roohia e te ati e te peapea; ua tamahanahana oia i to ratou mau aau mauui, e ua faaamu oia ia ratou i te maa no te pae varua e te pae tino atoa hoi. E taata herehia o Mohi e te mau taata atoa, e taeae e e hoa mau oia no ratou.

Aita o Mohi i haaputu i te tao'a na'na ra i roto i teie nei ao, ua haapao ra oia i te parua papai tei na ô mai: " Eiaha e haapue noa i te tao'a na outou i teie nei ao, i te vahi e pau ai i te huhu e te pe, i te vahi e tomohia'i e e eiâhia'i e te eiâ; e haapue râ i te tao'a na outou i nia i te ra'i, i te vahi e ore e pau ai i te huhu e te pe, e ore hoi te eiâ e tomo i reira a eiâ ai ".

E teie nei ua haere atu oia e parahi i roto i te reira vahi nehenehe te faaineinehia no'na ra.

Ua tupu ihoa te oto i roto i to tatou mau aau, e teie ia ta tatou parau hopea, "Ia ora na oe e Mohi i to oe haereraa, mauruuru i te mea e ua farerei matou ia oe, ua mamahia to matou hopoia na roto i to oe aroha e te mau parau nehenehé ta oe i haapii mai.

Ua oti nehenehé ta oe mau ohipa i roto i teie nei ao.

Papaiahia e Le Roy Mallory.

Ua tae mai te Tavana Rahi.

I te 17 no Mati i mairi a'enei ua tae mai te pahi farani ra o Ville de Verdun e i nia i taua pahi ra te reira to tatou Tavana Rahi ra o CHASTENET DE GERY. Ua fariihihia oia ma te hanahana rahi e ua mauruuru roa te Heheuraa. Apî no to'na taeraa mai e teie to'na hinaaro, ia manuia maitai oia i roto i to'na faatereraa i teie mau fenua moana nei.

Nania i taua pahi i hora na reva tu to tatou Tavana tahito ra o SAUTOT. Te ho'i ra oia i to'na parahiraa tahito, oia hoi, i te fenua ra o Nouvelles-Hébrides; e i to'na tere, te hinaaro nei matou ia manuia ta'ua mau ohipa i reira mai ta'ua i rave i onei.

E ati rahi ri'ari'a.

I te 18 no Mati i mairi a'enei ua tupu te hoê ati rahi ri'ari'a i te oire ra i New London, Texas, America. Ua parari te pani pape tamahanahana raa no te hoê fare haapiiraa, e no te puai o te haruru na puehu roa te fare haapiiraa e te mau taata atoa i roto ra. Ua pohe roa e pae hanere e tia-hapa taata i roto i taua ati ra e te rahiraa o ratou ra, e mau tamarii haere haapiiraa ana'e; no te rahi o te peapea i tupu na tuuhia te oire i raro a'e i te faatereraa o te nuu faehau.

Louis Drollet Gérant

Thomas L. Woodbury Imprimeur.

Rue Dumont d'Urville, Orovini, Papeete, Tahiti.